



**KENYATAAN AKHBAR
OLEH KETUA AUDIT NEGARA**

BERKENAAN:

**LAPORAN KETUA AUDIT NEGARA MENGENAI PENYATA KEWANGAN
KERAJAAN NEGERI DAN PRESTASI KEWANGAN AGENSI NEGERI PERAK
TAHUN 2018**

**LAPORAN KETUA AUDIT NEGARA MENGENAI AKTIVITI JABATAN DAN
AGENSI NEGERI PERAK TAHUN 2018 SIRI 2**

1. Pengauditan Penyata Kewangan Kerajaan Negeri dilaksanakan selaras dengan Seksyen 5(1)(a) Akta Audit 1957 yang menghendaki Ketua Audit Negara mengaudit akaun Persekutuan dan negeri. Pengauditan terhadap aktiviti jabatan/agensi pula merupakan pengauditan prestasi yang dilaksanakan di bawah Seksyen 6(d), Akta Audit 1957.
2. Perkara 107(1) Perlembagaan Persekutuan menghendaki Ketua Audit Negara mengemukakan laporannya kepada Kebawah Duli Yang Maha Mulia (KDYMM) Seri Paduka Baginda Yang di-Pertuan Agong yang hendaklah menyebabkan laporan itu dibentangkan di hadapan Dewan Rakyat. Berdasarkan Perkara 107(2) pula, laporan hendaklah dikemukakan kepada KDYMM Paduka Seri Sultan Perak Darul Ridzuan bagi memperkenan untuk dibentangkan di Dewan Undangan Negeri Perak.
3. LKAN mengenai Penyata Kewangan Kerajaan Negeri dan Prestasi Kewangan Agensi Negeri Perak Tahun 2018 setelah mendapat

perkenan KDYMM Seri Paduka Baginda Yang di-Pertuan Agong telah dibentangkan di Dewan Rakyat pada 4 November 2019. Manakala LKAN mengenai Pengurusan Aktiviti Jabatan dan Agensi Negeri Perak Tahun 2018 Siri 2 pula setelah mendapat perkenan KDYMM Seri Paduka Baginda Yang di-Pertuan Agong telah dibentangkan di Dewan Rakyat pada 2 Disember 2019. Seterusnya, kedua-dua laporan ini setelah mendapat perkenan KDYMM Paduka Seri Sultan Perak Darul Ridzuan akan dibentangkan pula di Dewan Undangan Negeri Perak pada 12 Mei 2020.

4. Laporan Ketua Audit Negara pada kali ini antara lainnya mengandungi perkara-perkara penting seperti berikut:

4.1. Pengauditan Prestasi Terhadap Aktiviti Jabatan Dan Agensi Negeri

- (a) Pengauditan prestasi telah dijalankan mengikut standard pengauditan antarabangsa iaitu *The International Standards of Supreme Audit Institutions* (ISSAI) 3000, 3100 dan 3200. Pengauditan prestasi yang dijalankan bertujuan menilai sama ada aktiviti/projek Kerajaan negeri telah dilaksanakan dengan cekap dan berkesan serta sejauh mana objektif aktiviti/projek ini telah tercapai. Ia juga bertujuan untuk menilai sejauh mana wang awam telah dibelanjakan dengan berhemat tanpa berlaku pemborosan dan pembaziran serta mendapat *best value for money*.
- (b) Bagi Laporan Ketua Audit Negara Tahun 2018 Siri 2 ini, dua (2) pengauditan prestasi telah dilaksanakan di peringkat Jabatan dan Agensi Negeri Perak. Pengauditan adalah mengenai Projek Rancangan Tebatan Banjir di Jabatan Pengairan dan Saliran Negeri Perak, dan Pengurusan Projek Menaik Taraf Kemudahan di Kompleks Sukan MBI di Majlis

Bandaraya Ipoh.

- (c) Secara keseluruhannya, berdasarkan skop pengauditan, dapat dirumuskan bahawa Projek Rancangan Tebatan Banjir (RTB) telah dilaksanakan mengikut tempoh yang dibenarkan dan mencapai objektif yang ditetapkan. Bagaimanapun, kelemahan di peringkat perancangan serta perubahan reka bentuk semasa pelaksanaan projek telah menjejaskan kecekapan pengurusan projek. Akibatnya, berlaku peningkatan kos sejumlah RM0.71 juta atau 3.2% berbanding kos asal projek yang berpunca daripada arahan perubahan kerja/pelarasan harga kontrak yang dikeluarkan. Selain itu, penyenggaraan bagi tiga (3) Projek RTB kurang memuaskan disebabkan kekangan pekerja dan peruntukan kewangan bagi melaksanakan kerja pembersihan.
- (d) Secara keseluruhannya, Projek Menaik Taraf Kemudahan di Kompleks Sukan MBI telah mencapai objektif naik taraf yang ditetapkan dan digunakan sebagai *venue* untuk acara yang dipertandingkan semasa SUKMA XIX di Negeri Perak. Bagaimanapun, wujud kelemahan dalam aspek pelantikan kontraktor, pentadbiran kontrak, pembayaran kepada subkontraktor dan pelaksanaan kerja naik taraf yang telah menjejaskan kecekapan pengurusan projek ini.

4.2. Pengesahan Penyata Kewangan Kerajaan Negeri Perak Tahun 2018

4.2.1. Pengesahan Penyata Kewangan Kerajaan Negeri

Pengauditan terhadap Penyata Kewangan Kerajaan Negeri Perak Bagi Tahun Berakhir 31 Disember 2018 adalah untuk memberi pendapat sama ada penyata tersebut menunjukkan kedudukan kewangan yang benar dan saksama serta rekod perakaunan yang berkaitan telah diselenggarakan dengan teratur dan kemas kini. Pengauditan yang dijalankan mendapati Penyata Kewangan Kerajaan Negeri Perak telah diberi Pendapat Tanpa Teguran. Penyata kewangan tersebut menunjukkan gambaran yang benar dan saksama tentang kedudukan kewangan Kerajaan negeri dan rekod perakaunan telah diselenggarakan dengan lengkap dan kemas kini.

4.2.2. Analisis Kewangan Kerajaan Negeri

- (a) Jabatan Audit Negara di samping mengesahkan Penyata Kewangan Kerajaan Negeri, juga membuat analisis terhadap kedudukan kewangan Kerajaan negeri.
- (b) Analisis Audit mendapati kedudukan kewangan Kerajaan negeri adalah kukuh. Baki Kumpulan Wang Disatukan pada akhir tahun 2018 bagi Negeri Perak telah meningkat sejumlah RM31.95 juta atau 3.1% menjadi RM1.077 bilion pada tahun 2018 berbanding RM1.045 bilion pada tahun 2017.
- (c) Baki Akaun Hasil Disatukan meningkat sejumlah RM9.92 juta menjadi RM612.45 juta berbanding RM602.53 juta pada tahun 2017. Kerajaan negeri telah mengakhiri tahun kewangan 2018 dengan lebih berjumlah RM9.92 juta berbanding lebih RM3.67 juta yang diperoleh pada tahun 2017.

4.2.3. Penyerahan, Pengesahan, Pembentangan Penyata

Kewangan dan Prestasi Kewangan Agensi Negeri

- (a) Mengikut Seksyen 5(1)(c) Akta Audit 1957, Ketua Audit Negara mempunyai kuasa untuk mengaudit penyata kewangan agensi negeri iaitu Badan Berkanun Negeri (BBN), Pihak Berkuasa Tempatan (PBT) dan Majlis Agama Islam (MAI). Objektif pengauditan adalah untuk memberikan pendapat terhadap penyata kewangan agensi negeri sama ada penyata ini menggambarkan kedudukan yang benar dan saksama serta rekod perakaunan yang berkaitan telah diselenggarakan dengan teratur dan kemas kini.
 - (b) Setakat 30 Ogos 2019, berdasarkan 30 Penyata Kewangan Kerajaan Negeri dan Agensi Kerajaan Negeri Tahun 2018, sebanyak 17 agensi telah mengemukakan penyata kewangan bagi tahun berakhir 31 Disember 2018 untuk diaudit sebelum atau pada 30 April 2019. Sebanyak 11 agensi pula telah mengemukakan penyata kewangan selepas tempoh ditetapkan. Dua (2) agensi masih belum mengemukakan penyata kewangan.
 - (c) Pada tarikh laporan disediakan, sebanyak 21 penyata kewangan agensi bagi tahun berakhir 31 Disember 2018 telah disahkan. Sebanyak 19 penyata kewangan agensi telah diberi Laporan Ketua Audit Negara Tanpa Teguran manakala satu (1) penyata kewangan agensi iaitu Majlis Agama Islam dan 'Adat Melayu Perak diberi Laporan Ketua Audit Negara Tanpa Teguran dengan *Emphasis of Matter*. Satu (1) penyata kewangan agensi lagi telah diberikan Sijil Berteguran, iaitu Lembaga Muzium Negeri Perak.
5. Ketua jabatan yang berkenaan telah dimaklumkan terlebih dahulu mengenai perkara yang dilaporkan dalam Laporan Ketua Audit Negara

untuk tujuan pengesahan. *Exit Conference* juga telah diadakan bagi tujuan membincangkan penemuan Audit dan mendapatkan penjelasan serta maklum balas terhadap isu-isu berbangkit. Bagi membolehkan tindakan pembetulan dan penambahbaikan diambil oleh ketua jabatan berkenaan, Jabatan Audit Negara juga telah mengemukakan lapan (8) syor terhadap aktiviti jabatan/agensi dan tujuh (7) syor terhadap penyata kewangan untuk memperbaiki kelemahan yang dilaporkan.

6. Dua (2) jilid LKAN Perak Tahun 2018 akan dimuat naik di Laman Web Jabatan Audit Negara selepas pembentangnya di Dewan Undangan Negeri Perak pada **12 Mei 2020**. Orang awam boleh melayarinya di alamat <http://www.audit.gov.my> mulai **12 Mei 2020** selepas jam 10.00 pagi. Sebarang pertanyaan lanjut/pandangan mengenai Laporan tersebut bolehlah dialamatkan kepada jbaudit@audit.gov.my.

Ketua Audit Negara
Malaysia
12 Mei 2020